


ŠULSKE NOWINY



Serbska wyša šula Ralbicy
UNESCO projektna šula
www.sorbische-schule-ralbitz.de

Jutrownik 2025
30. lětnik, 292. wudaće

Z liftom na horu

W poslednim tydženju januara podachmy so, 8. lětnik, do sněhakowarskeho lěhwa do Altenberga. Z ćahom a busom dojdźechmy sej do młodownje, hdžež rozdźělchmy so do mjeńšich a



wjetšich stwow. Knjez Rjeda a knjez Warnar nam w přebywarni sněhakowarski ekwipment pokazaštaj a smědźachmy sami wuspytać, kak so tajki črij wobuje. Po stódnym wobjedže chwatachmy na pistu a wupožcichmy sej škórnje a sněhaki. Džělachmy so do dweju skupinow - započatkarjo a pokročowani - a zwučowachmy, kak so na sněhakach „pizza“ dele jědže a wězo prawje borzdzi. Naša rjadowniska wučerka knjeni Serbinec tež sobu z nami wuknješe. Čas so spěšnje miny a po štyrjoch hodzinach podachmy so na dompuć do młodownje, hdžež so na wječer wjeselachmy. Kóždy wječor hrajachmy wšelake hry. Nam so wosebje lubješe, zo nam knjez Rjeda a knjez Warnar poker nawučištaj. Po krótkej nocy nóżkowachmy optimistisce k horje, tola hižo po někotrych metrach poča so dešćować. Cyle přemokani rozsudźichmy so za plan B, mjenujcy kinowe dopoždno w młodowni a kupanje w bliskej kupjeli. Wězo bě hišće čas, sej někotre chćóšćenki za film nakupować. Serbski film wo lodowym hokeju so nam lubješe. Popoždno so na zbožo jenož hišće miholeše, tak zo nóżkowachmy k reha-kupjeli „Raupennest“. Přijomnje ćopću wodu a wotpinacej hodzince po mokrym pućowanju a (za někotrych šulerjow



a šulerkow) njezwučenych pohibach na sněhakach jara witachmy. W rozmołwach jako rjadownja tež hišće lěpje hromadže zrosćechmy. Tróšku měrniši dzeń skónči so z wječerju w młodowni a zhromadnymi hrami. Po nazběranju nowych mocow mějachmy srjedu rjeńše wjedro, tak zo so po snědani zaso na puć na pistu podachmy. Čerstwje preparowana hora nas witaše a

hižo šwiknychmy so na lift. Džakowano knjezej Rjedže a knjezej Wornarjej so naša technika kóždy dzeń widžomnje polěpšowaše. Nětko běše tež načasu nawuknyć, što „pommes“ při sněhakowanju rěka a připadnje sydachu tež pomfritki k wobjedu. Wulka překwapjenka nas popoždnu wočakowaše. Naša rjadowniska wučerka knjeni Cyžowa překwapi nas z wopytom a słódnymi muffinami. Wona so tež přez naš postup wjeseleše a nas pohonjowaše. Po šěsć hodžinach na pisće zwaži sej kóždy z nas, tež wjetšu horu dele jěć a to wěsće a samo z kijemi. Štwórtk bě naš posledni dzeń na sněhakach. Po snědani rěkaše zaso „z liftom na horu“ a dalše zwučowanja slědowachu k wukmanjenju a polěpšowanju techniki. To bě tež wažne, dokelž wočakowaše nas po wobjedze wosebite wubědžowanje - „Serbski super G“. Mějachmy so potajkim w spěšnosći a technice po slalomowym parcoursu. Najrjeńše za nas bě, hdyž rěkaše „swobodny čas“, w kotrymž z přećelemi sami horu dele praskachmy. Wězo mějachu wučerjo stajnje wóčko na nas, tak zo so na zbožo nchtó chutnje njezrani. Džakowni běchmy knj. Serbinec, kotraž nas z plestrami pře mozlam zastaraše. „Hdyž je najrjeńšo, dyrbiš skónčić.“ Haj, tak nažel bě, nawječor podachmy so zaso wróco do młodownje. Tam čakaše na nas wosebita wječer. Mějachmy drjewjanu budku za nas rezerwowanu, w kotrejž mjaso a twarožki za burgery sami grilowachmy. Zbytne přidawki nam kuchnja młodownje hižo nakrane spřihotowa. Tuž dachmy sej słódný samočinjeny burger zestódzec. Napjatosć bě wulka, jako naši wučerjo dobyčerja a dobyčerku wubědžowanja kaž tež šulerja z najlěpšim wuwicóm a šulerku z najwjetšej česćelakomnosću mytowachu. Běchmy pak wšitcy hordži na to, zo smy sněhakowanje tak derje nawukli. Na tutym městnje chcemy so našim wučerjam knjezej Wornarjej, knjezej Rjedže a knjeni Serbinec hišće raz wutrobnje džakować! Po nažel hižo poslednim zhromadnym wječoru podachmy so pjatk zaso na dompuć.



Jutry

Jutry su křesćanski swjedžeń a čehodla to tak je, dyrbi poprawom kóždy wědžeć. Křesćenjo swjeća zrowastaće Jězusa. K tomu słuša tež typiski póstny čas, kotryž traje 40 dnjow. Njedzele su wuzamknjene. Mamy wězo tež wažne




nałožki kaž na přikład woprowanje jutrowneho jehnjeća, zapalenje jutrowneho wohenja a swjećenje jutrowneje swěčki. Jedyn nałožk pak njesmě so zabyć: wóskowanje a barbjenje jejkow. Jejka swěća so po tym w mnoho barbach, su jenož běłe abo čorne abo tež z pisanyimi nalěpkami wupyšene. Sće hižo wědzeli, zo wotwodźuje so słowo „Ostern“ wot „Ostara“? Tak rěkaše mjenujcy germaniska bohowka nalěća, płódnošće a zerja. Z „Ostara“ bu naposledk džensa znate „Ostern“, jutrowny swjedžeń. Zawěsće wjeseliće so na zajaca, kotryž jejka schowa, abo? Ale njezabudźće, za čo jutry poprawom steja: za Jězusa a germanisku bohowku. Přeju wam wšěm wjele wjesela při pytanju jutrownych jejkow.

tekst: Liska Markulec

Předšulske džěci zabawjeli

Pjatk, 24.01.2025 přewza rjadownja 9/1 wulku zamołwitosć a staraše so wo předšulske džěci Rabličan pěstowarnje. Na to běchu so hižo tydženje do toho přihotowali. Předšulske džěci so do štyrjoch skupinow ze stajnje štyrjomi šulerjemi rozdžělichu. Jedna skupina pječeše, druha pasleše a w třećej hrajaču



so lóštne hry. Štwórta skupina měješe wosebitu ideju: woni zblížichu předšulskim džěcom wšědny dzeń w šuli a stajichu jim zajimawe nadawki. Cyłkownje zabawjachu šulerjo džěci dvě hodžinje, při čimž džěci sami rozsudžichu, kotru staciju wopytaja. Naš rjadowniski wučer knjez Zahrodnik bě překwapjeny, zo smy to tak derje zmištrowali.

Džěci wjeselachu so nad wotměnjatymi stacijemi. Tak poskići so za kóždého něšto. Cyłkownje běše to woprawdže wulkotne nazhonjenje a w předšulskich šulerjach zbudži so tak wjeselo na šulski čas.

tekst: Milan Borška

Nowe laptopy dóstali

Wuknjacy 8. lětnika Serbskeje wyšeje šule Ralbicy Józef Měrš, Luiza Mikławškec, Gloria Korchec a Hańža Handriec (wotlěwa) wjesela so nad nowymi laptopami. 16 mobilnych nastrojow je Delanske kubłanišćo w zwisku z digitalnym paktom za šule tele dny dóstało. Nimo kabineta informatiki a sadžby tabletow maja Ralbičenjo nětko dalše móžnosće we wučbje digitalnu techniku zasadźeć.



tekst a wobraz: Jan Rjeda

wułušćenje kwisa (nalětnik 2025): počas, popjelna srjeda, Köln, marmelada

INFORMACIJE – TERMINY – WŠELČIZNY

01. jutrownika

staršiske rěčne hodžiny

03. jutrownika

olympiada ruščiny

wot 18. do 25. jutrownika

jutrowne prózdniny






Naši lětuši křižerjo



	Kak rěkaš?	Kotry raz?	W kotrej wosadže?
šulerjo	Rafael Čornak	1	Ralbicy
	Robert Čornak	1	Ralbicy
	Tician Šnabel	1	Ralbicy
	Max Wowčer	1	Ralbicy
	Sören Čórlich	2	Ralbicy
	Richard Dittrich	1	Ralbicy
	Maik Rücker	2	Ralbicy
	Walentin Wjesela	1	Ralbicy
	Felix Grimmig	2	Ralbicy
	Cornelius Korch	2	Kulow
	Fabian Korch	1	Ralbicy
	Beno Mikławš	1	Chrósćicy
	Lenny Michałk	2	Kulow
	Luis Suchy	2	Ralbicy
	Emanuel Čórlich	3	Kulow
	Mikławš Domaška	2	Ralbicy
	Liwius Frencel	3	Ralbicy
	Patrik Mikławš	3	Kulow
	Pawl Mikławš	3	Chrósćicy
	wučerjo	Maksimilian Zahrodnik	13
Mathias Kliemank		15	Kulow
Michał Wowčer		19	Chrósćicy
Křesćan Zahrodnik		22	Chrósćicy
Jan Rjeda		25	Pančicy-Kukow



Přejemy wšitkim čitarjam a
čitarčkam žohnowane jutry a
wočerstwujace prózdniny.

